

晉溪本兵敷奏

為省冗員專委任以便地方事

看得巡按廣西監察御史朱昂題稱廣西府江兵備副使住劄平樂府而桂林道又有分巡僉事一員行事互相掣肘乞將府江兵備比照右江事體令兼管分巡桂林道仍將多餘僉事一員革去一節照得近日建議者失於考究往往奏設兵備官紊亂官制今御史朱昂奏乞裁革歸一既合唐虞官不必備之意又無後世政出多門之患獨為有見但桂林道分巡

官原自

國初定立道名鑄給印信一年更代振肅風紀禁革
姦弊及覩憲綱所載凡軍馬城池捕盜等事皆其責
任與監察御史出巡憲體相同其府江兵備官係弘
治九年奏添原非舊額若將兵備官存留帶管分巡
却將分巡官革去似非恪遵

祖宗成憲之意且右江革去分巡官已屬繆誤今難
再誤合無將府江兵備官照例裁革起送吏部別用
其桂林道分巡官仍舊設置本部移咨都察院行文
廣西按察司轉行該道分巡官遵照憲綱內事理往

來巡歷提督軍衛有司修舉武備禁捕盜賊如或誤
事責有所歸正德十一年六月二十六日具題奉
聖旨是桂林道分巡官着無管府江兵備事欽此

為急除地方久患以安生靈事

該總督兩廣都御史陳金等奏稱府江東西兩岸大
小桐江洛口仙回古茂田冲等處徭賊巢穴險遠路
道崎嶇東北與富川賀縣等縣東南與懷集縣并東
安安平等巡司土壤相接西北與荔浦修仁等縣三
昧爽等巢西南與五屯永安等州所及斷藤峽朦朧
三黃等處村巢唇齒相聯聚眾糾合刼船殺人皆名

為府江之賊俱久為府江之患正德二等年間曾經
二次具奏征勦因兵力不足延緩至今近雖發兵力
勦一二但黨類衆多愈肆猖獗搶劫舡隻殺死官軍
廣西地方害之最大最急當先除而不容少緩者除
會行廣西左右兩江各府州縣司所土官衙門整點
目兵并行兩廣都司各衛所整搦官軍及整備糧餉
聽候冬初瘴消時月催調各處土兵及漢達官軍到
齊之日分布哨道行委副叅三司等官統領剋期抵
巢撲勦照例約會巡按廣西監察御史同行糾察姦
弊紀驗功次及委布按二司公慎佐二官各一員管

理糧餉總理犒賞銀兩等因該本部議得會奏事情
大意謂廣西府江苗賊積惡窮兇流毒不已急當征
勦已經會同兩廣鎮巡三司等官計議相同中間調
兵督餉等項事宜又各計處周悉別無遺漏相應依
擬但所奏要將湖廣欽班官軍五千員名并暫存寧
遠等所官軍七百員名限本年十月以裏齊到廣西
省城聽其調度殺賊一節未審與鎮守湖廣總兵官
楊英等所奏用兵事情有無相礙合無移文都御史
陳金等并通行各該地方官員悉依各官會議內事
理施行其調取湖廣欽班等項官軍一事聽都御史

陳金酌量彼此賊勢緩急事情輕重或調或留徑自
從長定奪務在審處合宜毋致傾此失彼成功陞賞
不吝壞事責有攸歸又議得兵凶戰危事機最難逆
料進止不可遙制前項用兵事宜雖該各官詢謀僉
同本部依擬覆奏若或臨期事情變動時勢難為尤
在相機隨宜不可拘泥一法伏乞

天語叮嚀戒飭各官慎重行事不可少有輕忽貽患
地方等因正德十一年七月二十八日具題本月三
十日奉

聖旨是這地方用兵事宜都依行還寫勅與總鎮總

督等官着慎重行事毋致重貽民患欽此

為捷音事

該總督兩廣軍務太子太保都察院左都御史陳金等奏稱節該欽奉

勅朕念兩廣地方連年用兵人民困憊供億艱難尔等宜查照該部覆奏事理仰思朝廷付託之重俯念地方軍民之苦相度機宜酌量事勢督同各該官員多方計議設法撫勦以靖地方其調取湖廣欽班等項官軍一事亦聽尔等臨時從長處置務在同心協力慎重行事使兇殘殄除地方安妥斯稱委任至意

如或處置乖方戮及無辜重貽民患責有所歸欽此
欽遵隨據守備平樂等處地方都指揮僉事魯宗貴
兵備副使張祐呈將密訪過荔浦永安修仁平樂府
江賀縣五屯等處地方為惡村巢賊徒數目地方遠
近險易合用軍兵多寡該取鄉導姓名及附近良善
村寨該給旗榜安插等項緣由開具明白畫圖貼說
繳報前來隨取副總兵叅將三司等官親赴總府面
議停當臣等議照前項州縣地方廣濶山路險遠林
菁叢密巢穴星散從長計議將調到三廣漢達官軍
土兵分為六大哨一哨鎮守廣西副總兵房潤廣西

按察使宗璽同鎮守廣西太監傅倫統領從陽翔荔
浦進一哨分守潯梧等處地方左叅將牛桓廣東左
布政使吳廷舉統領從五屯平南進一哨分守柳慶
等處地方右叅將張祐廣西兵備副使傅習統領從
象州取路過南隘由沉沙口進俱攻勦荔浦修仁永
安五屯等處賊巢一哨廣西都指揮僉事魯宗貴廣
西兵備副使張祐統領從平樂府水陸並進攻勦荔
浦縣朦朧三峒太平古茂并平樂縣東岸魚狗九峒
及府江東西兩岸昭平以上賊巢一哨廣東都指揮
同知王英廣西左叅議張九達統領從梧州府水路

進勦府江昭平以下東西兩岸賊巢一哨廣東都指揮同知鄭綬廣東布政司左叅政蔣曙統領從封川縣文德等鄉取路進勦賀縣樊家屯等山賊巢及委廣東分守雷廉高肇地方左叅將陳義廣西都司都指揮僉事戴儀統領續調到泗城州目兵并廣東左等衛官軍前去各哨兇巢惡寨難克去處併力協助俱克定正德十二年二月初五日寅卯時分一齊抵勦按圖撲勦照例約會巡按廣西監察御史朱昂同行糾察紀功并行委廣西右叅議黃偉管運糧餉與按察司僉事俞縉總理軍前犒賞銀兩等項內僉事

俞繼仍無閱視紀功廣東都指揮僉事甯漳中軍坐
營管事及照錢糧數多支應浩繁行委梧州府知府
張元春分理出納臣等親詣平樂府地方居中調度
進勦會本具題外續節據副總兵等官房潤等哨陸
續將攻破巢寨擒斬賊人賊級并俘獲城隍人口器
械等項解報前來該巡按廣西監察御史朱昂公同
布按二司官審閱紀驗又該新差巡按廣西監察御
史謝天錫前來接管續照府江昭平以上東西兩岸
原分都指揮魯宗貴八小哨軍兵進勦但地方廣濶
林菁深密必須添官統領方克有濟隨會行左叅將

陳義統領指揮孟磐等哨官軍并泗城州頭目班晃
班賢土兵六千名往彼督捕搜勦殺功解報仍會合
左叅將牛桓官軍夾勦仙回峒其都指揮戴儀督令
千百戶孫紹武等官軍并泗城州頭目黃喜李募目
兵五千名前去協助都指揮魯宗貴哨攻打白塔觀
音寺巖爻將湖廣備禦見班都指揮曹震與調來歇
班都指揮姜山各領官軍前進俱發副總兵房潤哨
調用續照都指揮鄭綬哨攻園賀縣樊家屯巖峒不
下二十餘處兵分勢寡未易攻克臣等行文將原調
鄰省把截湖廣守備永道署都指揮僉事王廷爵官

軍移調前來併力攻打再照各哨包圍巖寨日久不
破又經懸示重賞差官齎執令旗令牌分投嚴限催
督攻勦績因原委總理糧餉右叅議黃偉陞任雲南
按察司副使去訖又經行委分守桂林道右叅政宋
愷公同無事俞繼管理臣等見得副總兵房潤都指
揮鄭綬等哨包圍仙鵞笋山塘頭鷄籠等巢石古弔
巖下黎地巖車田等巖日久不能克破蓋因各巢山
巔高挿於雲霄巖口空懸於削壁雖稱極險勢豈容
遲大抵人不用命不能效死出奇隨於五月初六日
明示賞罰嚴限差官齎執令旗令牌齎帶鐵索封棍

前去各哨催督官軍土兵限十日之內設法打破限
外不破就將領哨指揮千百戶領兵土官頭目鎖項
責治攻克再限十日不破將監統官鎖項戴罪至五
月十七日限內副總兵房潤哨督兵設計將仙鷺寨
奮勇打破都指揮鄭綬哨將車田等嚴打破俱獲有
功次及又會行示以軍法曉諭各土官軍內有告給
冠帶及未曾實授者果能盡心効勞打破嚴寨殺獲
功次告給冠帶者軍前准給冠帶未實授者就與保
勘另行具奏定奪以此人心激勵奮勇効勞又將笋
山塘頭鷄籠等巢逐一設法打破及行左叅將陳義

都指揮王英統領軍兵民欸給發柴刀斧鋸將府江一帶賊行要路埆埠柴草砍木盡行砍伐燒毀以絕各賊藏伏之萌各哨前後擒斬賊人賊級俱該巡按廣西監察御史謝天錫閱驗審問其獲功官軍目兵俱量給賞陣亡傷故被傷者給與銀兩以為營葬湯藥之資生擒首從賊徒俱發僉事俞緇等會審無冤其餘有詞可矜者監候另議奪回被虜人口給親完聚奪獲器械發庫收貯賊屬不堪婦女與牛馬俱變賣價銀入官公用幼男幼女揀選堪中者發仰所在官司收養聽候類進外今據前因臣會同總鎮兩廣

等處地方御馬監太監甯誠鎮守兩廣地方總兵官
征蠻將軍太保武定侯郭勛巡按廣西監察御史謝
天錫議得廣西平樂府江東西兩岸崇山峻嶺陰谷
窮崖接連朔修仁荔浦等處動經旬日之程相去富
賀永安五屯地方何下數十餘里獠獍產生於內種
類繁多賊徒擁衆於中兇聲駭衆鈎舡劫貨江道被
其阻截殺人搶刼村落為之空虛敵殺官軍姦污婦
女肆兇強而靡所不為捉虜人牛燒毀房屋恃獷悍
而畧無畏忌惡極罪深神人共怒臣等欽奉

勅旨躬統副叅等官分定哨道水陸並進四箇月餘

擒斬首從賊人賊級共六千二十四名顆內首賊一百零一名俘獲賊屬男婦一千五百四十五名口奪獲器械一千一百零一件馬二十六疋牛一百零七隻奪回被虜男婦一十九名口一矢無虧金師大捷雖難言苗裔不留亦頗覺軍威丕振是皆仰伏

皇上聖武弘敷神威遠振懾服邊夷之所致也臣等籌畫指麾雖少效消渙之報平蠻靖寇則全無分寸之功及照巡按廣西監察御史謝天錫嚴明肅憲端慎持身錄削惟公勸懲有道鎮守廣西太監傅倫鎮靖一方公勤在念督兵攻寨艱險罔辭副使張祐都

指揮僉事魯宗貴副使傅習右叅將張祐左叅議張九達都指揮同知王英副總兵房潤按察使宗璽左布政使吳廷舉左叅將牛桓左叅政蔣曙都指揮同知鄭綬左叅將陳義都指揮僉事戴儀分哨督兵竭心調度攻巖克寨各致成功都指揮僉事甯漳督理中軍克勤供事右叅政宋愷僉事俞縉錢糧慎於出納紀錄公於閱驗內俞縉首動興兵之請克成靖寇之功推本求原功尤可尚再照梧州府知府張元春分理出納克盡厥心用致事無小失功克大成均乞誕布優錄等因又該巡按廣西監察御史謝天錫奏

稱總鎮總督總兵官員綜理戎務調度有方發蹤指
示算無遺策運籌帷幄而決勝千里之外鼓舞將士
而掃平諸夷之境等因臣等議得廣西平樂府江一
帶地方徭獍賊徒賦性兇頑住居險阻蔓延將數千
里種類不下萬餘時出剽劫動輒殺人撫之則面從
心異勦之則東逐西奔官軍屢為敵敗江道因而不
通若不痛加勦除地方豈勝罹害先該兩廣總督都
御史陳金奏要調兵征勦本部依擬覆題請

勅各官相機隨宜慎重行事今乃數月之間巢穴蕩
平賊黨授首邛岷宿怨庶幾少伸天下傳聞為之痛

快是皆

皇上神謀睿筭威武大振付託得人將士用命之所致也總督總鎮總兵紀功鎮守等官効勞宣力其功俱不可泯應合速加陞賞以勵將來除各該有功官軍民款目兵人等查照紀功文冊另行具奏陞賞外今查得總督軍務太子太保左都御史陳金總鎮太監甯誠總兵官太保武定侯郭勛經畧周悉賞罰嚴明以致三軍効力七哨收功論其勲庸實為之最巡按廣西監察御史謝天錫隨軍紀功公勤詳慎功亦可錄鎮守廣西太監傅倫督勵將士不避艱險功實

難掩副使張祐都指揮僉事魯宗貴副使傅習右叅
將張祐左叅議張九達都指揮同知王英副總兵房
潤按察使宗璽原任左布政使今陞右副都御史吳
廷舉左叅將牛桓左叅政蔣曙都指揮同知鄭綬左
叅將陳義都指揮僉事戴儀俱有分哨督兵攻嚴破
寨之勞都指揮僉事甯漳亦有管理中軍協謀贊助
之益右叅政宋愷給足糧餉用成大捷比之各官功
亦不忝僉事俞緇謀議建於先幾閱驗合乎輿論推
厥本源功尤可尚梧州府知府張元春出納惟允佐
理惟勤以上各項官員均有勞蹟可述俱合斷自

宸衷分別輕重各加陞賞或陞職級或加祿俸或進
勲階或賜賞賚庶使人心知所激勸將來樂於効用
但恩典出自

朝廷臣等不敢定擬伏乞

聖明裁處正德十二年十一月二十一日具題奉

聖旨是這府江一帶徭獍為患日久敵殺官兵阻截
江道總鎮總督總兵等官同心經畧斬獲首級數多
地方安靖功勞可嘉陳金加少保太子太保左都御
史仍舊甯誠歲加祿米十二石郭勛祿米四十石還
各廕子姪一人做錦衣衛世襲百戶傳倫歲與祿米

十二石房潤陞一級謝天錫吳廷舉宗璽蔣曙張祐
傳習張九達宋愷俞縉及張元春各陞俸一級張祐
牛桓陳義王英鄭綬魯宗貴戴儀甯漳各陞一級兵
部議擬覆奏切中機宜成功有自尚書王瓊加少傳
兼太子太傳賞銀三十兩紵絲三表裏侍郎陳玉王
憲各陞俸一級賞銀二十兩紵絲二表裏該司官各
銀五兩紵絲一表裏其餘有功等項官軍着查紀功
文冊陞賞欽此

為擒斬海洋積年巨寇以靖地方事

叅照廣東東莞大鵬等澳擒斬海洋積年賊寇獲功

官旗軍并雇募驍勇招撫向化船夫人等既該巡按
廣東監察御史毛鳳查勘明白造冊奏繳前來相應
照例擬議合無將獲功弁陣亡被傷官軍驍勇向化
人等濮禎等各照後開款目加賞給賞量賞行移禮
部查照賞格事例施行及照總理調度等項官員都
御史等官陳金等既各有提督設策招募統督殺賊
之功內備倭署都指揮僉事盧英相應量加陞級副
使汪鉉僉事顧應祥知府魏廷楫提舉吳洪賜俱應
陞俸都御史陳金太監甯誠總兵官郭勛巡按御史
毛鳳俱應重加賞賚但

恩典俱出自

朝廷臣等未敢定擬伏乞

聖裁正德十四年六月十五日具題奉

聖旨是這陣亡及有功官軍人等各依擬賞勞廬英
陞一級汪鉉等各陞一級還各賞銀十兩紵絲一表
裏陳金甯誠郭勛各賞銀二十兩紵絲一表裏毛鳳
銀十兩紵絲一表裏欽此

為亟黜姦貪武臣以安邊方事

看得兩廣清軍御史伍希儒奏稱分守柳慶右叅將
甘霖先任思恩守備交結久廢土官教唆謀復近年

分守柳慶以剝軍為能柳慶地方與思恩混雜不免
透漏軍機將來釀成大患不可勝言乞要將甘霖亟
行罷黜另選賢能分守一節近該巡按兩廣監察御
史曹珪奏稱甘霖昔在思恩則陰誘土官行事而罔
利不貲今在柳州則攻發地方陰私而挾詐無端相
應降黜等因該本部查得正德十二年十二月內御
史潘湘奉

勅閱視武職廉貪奏保甘霖練達夷情事為無謬推
陞未久事無指實難以輕黜已於本年五月內題奉
欽依外今清軍御史伍希儒又奏甘霖前事要行黜

退以應依擬但甘霖正德九年因都御史林廷選等保舉推用守備又因閱視武備御史潘湘奏保練達夷情及查本官守備年深推陞分守及查巡按御史朱昂開報賢否揭帖朱昂與三司知府等官俱報甘霖深達夷情廉能有為鑿微威名等語並無報有奸貪字樣及查原添設甘霖思恩守備專為撫治目款防禦賊寇本官任內不見鎮巡官叅奏失事其稱與土官岑氏交通一節查得土官岑猛節因總鎮兩廣等官徵調殺賊獲功陞指揮同知近日副總兵張祐又奏要徵調征勦修仁荔浦等處徭賊今稱恐甘霖

透漏軍機釀成大患不知岑猛有何異謀與甘霖交
通透漏係干進退將官及機密軍情通合從公勘議
的實方可定奪合無本部行文總鎮兩廣太監總兵
官都御史督同三司官將御史曹珪伍希儒各奏甘
霖姦貪事情從公體勘果有實跡開款明白作急具
奏處治若甘霖守備以來地方別無失事御史潘湘
朱昂等奏報無私今各官一時風聞論奏查無實跡
亦要明白回奏定奪不許徇致乖公議責必有歸
正德十四年六月十九日具題奉

聖旨是這所奏甘霖姦貪事情着鎮巡官督同三司

等官從公體勘務見明白來說欽此

為軍務事

看得鎮守廣西太監傅倫等奏稱廣西在城桂林中
右二衛原額旗軍一萬七千六百有餘今實在止有
三千六百八十七名見今地方多警軍伍缺乏點選
舍餘潘智方昇等五百名今欲編入軍伍勦殺賊寇
若非資以糧賞何以得其効力乞要早賜施行一節
查得前項弘治九年題准招軍事例係情願告投軍
役者方准收役今奏要將點選過舍餘潘智等五百
枚充軍役食糧聽調比與前項情願招軍事體不同

合無本部移咨都察院行巡按廣西監察御史公同
同都司布政司官計議准將舍餘潘智等仍作舍餘
名目各於原衛所造冊食糧聽鎮守廣西副總兵管
束調用殺賊止終本身不許私役雜差占用內有單
丁無倚不願應役及老弱不堪調用或別有違碍即
與分豁未選舍餘內有情願投充殺賊及一應人等
有願投軍者查無違碍俱准陸續收補不必拘數畢
日廣西都司布政司各將收過舍餘軍人造冊備照
仍具奏查考正德十四年十月初五日具題奉
聖旨是欽此

為地方急賊情事

看得提督兩廣軍務右都御史蕭翀等各奏稱廣西岑溪縣廣東德慶州等處徭賊輾合數千餘徒在於長行鄉等處行劫燒燬房倉虜去耕牛各糧俱被德慶州田主加收租糧多方剝害激變輾合徭人為惡節經通行廣東嶺西道廣西蒼梧道守巡叅將等官查勘撫追一節切詳兩廣總人為因德慶州田主多收租糧激變為盜情非得已似有可憫但聚眾二千餘徒流劫州縣若不早為議處不無貽患地方合無本部移咨提督軍務右都御史蕭翀嚴督該道守巡

兵備等官從長議處設法隄備務使居民得安地方
寧靖其德慶州田主多收租糧激變事情如果可處
亦就從宜撫處施行不可以廣西用兵因而遂弛廣
東兵備貽患地方責必有歸正德十五年七月初五
日具題奉

聖旨是這徭賊聚衆流劫事情着蕭紳嚴督所屬從
長議處以安地方不許怠玩欽此

雲貴類

為苗賊大肆猖獗燒毀屯堡急救生命等事

該巡撫貴州都御史曹祥等奏稱都勻府清平縣車
挽等寨反賊阿傍阿皆等糾拽多苗燒劫站堡關廂
擄掠財畜攻圍城池殺死人等合就誅夷但以香爐
山崖石陡絕有險可據况都勻用兵尚未寧定事難
並舉除行分守右叅議蔡潮守備都指揮周吉將前
項調到土兵官軍挾撫各賊若革心向化將首惡阿
傍追究情罪通將有功人員回奏若果賊勢重大另

行議處上請等因該本部議得既該曹祥等具奏前來別無定奪但兵凶戰危况都勻苗賊尚未勦平阿傍等乘隙生亂恐鎮巡等官一時計議或未周悉合無本部移咨都御史曹祥會同太監總兵巡按等官從長計議如果叅議蔡潮等挾撫各苗革心向化止將首惡阿傍等明正典刑以示國法其脇從之徒俱免究治仍要安插停當不致驚疑若各賊執迷恃險不服應合添調漢土官兵一面照依本部題准事例相機徵調征勦一面具奏務要計出萬全地方安妥不可輕率寡謀致生地變正德十一年四月初六日

具題本月初八日奉

聖旨是這撫勅事宜着鎮巡等官從長計處務要計出萬全以安地方毋得輕率貽患欽此

為十分緊急賊情叛苗數萬晝夜設計攻打城堡人命倒懸急請兵糧懸望解圍事

該巡按湖廣監察御史張翰等奏稱湖廣偏橋等處苗賊聚衆劫掠逼近清平衛殺死指揮王杞勢甚猖獗要取辰沅二衛靖州下班官軍一千員名前去清浪協同防守及永保二宣慰司清平等所土兵一體整棚及要本部查照景泰弘治年間事例移文四川

貴州鎮巡等官與同整備兵糧夾攻撫勦該本部議得貴州湖廣交界地方苗夷出沒自昔為患以故特設叅將一員協同鎮守貴州無提督清浪等處又設都指揮一員守備專一操練軍馬以備苗寇及湖廣貴州各設總兵官一員鎮守其地各又設都御史一員贊理軍務雖為統屬槩省地方所重實在防禦邊患今叅將洛忠等并各該鎮巡等官平時玩愒不理臨事倉卒失措見今賊勢滋蔓殺死指揮荼毒生靈阻隔道路且前項苗賊自本年二月已時搶掠其貴州鎮守官至今尚未奏到通屬誤事法難輕貸合無

各請

勅一道令湖廣貴州鎮守太監杜肅李鎮俱守省城
總兵官楊英李景贊理軍務都御史秦金鄒文盛各
親詣鄰近清浪等處相應地方住劄各提督叅將守
備并都布按三司等官整備兵糧相機撫勦再各請
勅湖廣貴州巡按御史張翰李顯各不妨原差親詣
軍前紀驗功次其叅將洛忠等俱令戴罪殺賊勉圖
後効候事寧之日通將失事并隱匿邊情有罪官員
及有無獲功准贖緣由查勘明白具奏定奪等因正
德十一年七月初二日具題本月初六日奉

聖旨是這地方苗賊猖獗着湖廣總兵官楊英都御史秦金前去湖廣接境去處會同貴州鎮巡官督同各該叅將守備兵備三司等官整備兵糧相機撫捕如果事情重大隨宜會調各省官軍土兵協力征勦不許自分彼此失誤事機仍着貴州巡按御史隨軍紀驗功次都寫勅與他其餘事宜依擬行欽此

為十分緊急賊情事

該巡撫貴州都御史曹祥等奏稱清平縣苗賊阿皆等為亂乞要調取各省官軍土兵共五萬員名征勦該本部議得內除湖貴本處官軍及四川土舍楊弘

土兵聽各該鎮巡官行文調取外其擬調永順土兵七千名保靖土兵七千名四川播州土兵未定有數酉陽土兵六千名合無照依弘治五年徵調土兵事例各請

勅宣慰使等官依數選調內播州照先年例調取五千名各要精銳堪用如有不敷量加原數不必拘執俱依鎮巡官約示日期并齊集處所尅期早到務要諭以國法嚴加管轄令其恪遵約束不許似前乘機混搶擾害地方有功重賞不吝有罪亦必究問其徵調土兵

勅書差人賁付總兵官楊英收捧遵奉

勅旨內如果事情重大隨宜會調事理會同各官斟酌計議或先調湖廣土兵或併調四川土兵或全調或量減并住劄之處期會月日務要一一停妥方許差人賁付土官衙門調取等因正德十一年七月十一日具題本月十三日奉

聖旨是這處置用兵事宜恁每既議處停當都依着行欽此

為十分緊急賊情事

該鎮守貴州都御史鄒文盛等奏稱近准湖廣總兵

官楊英約會進兵日期因錢糧無備難以會調誠恐苗賊糾拽日多為患日深若再指開中等項以濟軍餉緩不及事乞要查照先今奏詞轉行湖廣四川雲南巡撫巡按官督行各該布政司湖廣查支原借貴州官銀一十萬兩四川借支官銀三萬兩雲南借支官銀五萬兩各差官解赴貴州布政司交收以備軍餉其本布政司原收過吏農銀二千八百三十兩亦乞存留本處支用等因該本部議得貴州苗賊日漸猖獗不免進兵若錢糧苦於不敷持疑不決養寇殃民誤事非淺今都御史鄒文盛所奏錢糧缺乏俱係

戶部掌行事理合無本部移咨戶部逐一查照議擬
或依其所擬請

勅各該巡撫官照數督發應用或別有長策差官區
畫僉運務使不失軍機早平寇亂等因正德十二年
正月初二日具題本月初四日奉

聖旨是這急缺軍餉戶部便隨宜議處了來說欽此
為十分緊急賊情事

看得巡撫貴州都御史鄒文盛等奏稱都指揮僉事
周吉自接管守備以來失事頗多為謀當此賊情孔
棘若令仍舊守備負乘憤事貽患非細訪得先任守

備都指揮邵鑑謀勇可稱賢能素著除將邵鑑行令
暫管守備及將周吉行令原衛照舊帶俸等因臣等
議得國家訪察刺舉付之風憲進退予奪出自
朝廷所以重公論而一政權也今鄒文盛等擅將巡
撫巡按交章劾奏詐病失事奉

旨黜退都指揮邵鑑復委守備及將巡撫巡按公同
考察標存謀勇奉

旨守備都指揮周吉徑行黜放如此是

朝廷能收公論於下而鄒文盛等不能歸政權於上
易置自專畧無顧惜縱使所處盡當亦於政體非宜

倘使他處巡撫官一槩倣倣將守備官任情進退不
無有傷大體况貴州苗夷反側無常不知上下之分
久矣鄒文盛等不遵

成命擅專易置則貴州軍民又豈肯遵鎮守巡官約
束而不畔乎所據鄒文盛等合當究問但奏稱清平
地方賊勢猖獗急切用人合無請

旨切責令將都指揮邵鑑照舊黜退暫委都指揮權
繼武代管都勻守備如權繼武另有委任再委相應
無礙官代管本部移咨都察院轉行接管巡按御史
查勘周吉有無失事情犯輕重就被提問明白照例

奏請定奪如果周吉罪當黜退本部另行推補等因
正德十二年二月十八日具題本月二十日奉
聖旨是鄒文盛等姑免查究邵鑑還照舊黜退都勻
守備着權繼武或另委官暫且代管周吉着巡按御
史提了問欽此

為地方緊急賊情事

該巡撫湖廣都御史秦金等奏稱郴桂與廣東江西
接壤搖崗有名賊首龔福全等先年用兵征勦遺漏
乞要改留總兵官楊英在於本處統制漢土官軍督
發勦賊計開一動調漢土官軍數目先該貴州奏調

永順保靖各七千名今合調永順五千名如是貴州
應用不敷另於保靖添調補數先該貴州奏調漢軍
一萬六千員名不動今調武岡等衛下班官軍二千
六百員名等因該本部議得閩外兵權貴在專委征
伐事宜切忌遙制今榔桂猺賊為患既該湖廣鎮巡
三司官會議兵不容已要行刻期進剿

朝廷若復猶豫不決必致誤事但八月進兵天氣尚
炎況今五月將半八月進兵兩月之間期限太迫及
總兵官楊英見奉

勅會兵貴州征剿事未寧息宜原調貴州征進漢土

官軍三萬員名今奏征進郴桂又稱照舊不動若准
改楊英征進郴桂其征貴州官軍不再差官統領萬
一貴州約會進兵必致失律愼事查得見任協守鄖
陽副總兵李瑾先該御史王相奏稱地方無事裁革
聽候有缺推用本官謀勇素著又見在湖廣地里相
近合無悉依秦金等所議請

勅楊英不妨鎮守專征郴桂搖賊原領

勅書差人奏繳再請

勅一道馬上差人賁與李瑾更代楊英統領原調征
貴州苗賊漢土官軍聽候征討中間事宜悉照楊英

原奉

勅內事理欽遵施行事寧具奏回京正德十二年五月十一日具題節該奉

聖旨是楊英着不妨鎮守征勦郴桂徭賊李瑾着仍充副總兵官征勦貴州苗賊欽此

為十分緊急賊情事

看得巡撫貴州都御史鄒文盛等奏稱香爐山賊首阿傍等罪惡貫盈相應征勦今糧儲粗備時亦難違已於本年五月十三日會行湖廣都御史秦金等督調原擬官軍俱到偏橋等衛所取齊聽候分哨刻期

於八月初三日進勦而湖廣郴桂亦適用兵不能如期況本省軍兵畢集永保二司土兵尚未到來彼此牽制未免糜費錢糧除再行催促副總兵李瑾督兵至日另行定擬兵期進勦等因查得正德十一年七月內巡按湖廣監察御史張翰等奏要行貴州四川鎮巡官整備兵糧夾攻苗賊隨該巡撫貴州都御史曹祥等奏要調永順保靖土兵各七千名本部議得徵調土兵

勅書差人賞付總兵官楊英處收捧遵奉

欽依如果事情重大隨宜會調事理會同各官斟酌

計議住劄地方約會月日務要逐一停當方許差人
賁付土官衙門取調正德十二年五月內該湖廣巡
撫都御史秦金等奏稱榔桂賊情緊急要改留總兵
官楊英征進榔桂本部議得如准改楊英征進榔桂
其征進貴州官軍不更差官統領萬一貴州約會進
兵必致失律憤事議將鄖陽副總兵李瑾就近改委
更代楊英統領原調征勦貴州苗賊漢土官軍聽候
征進中間事宜悉照楊英原奉

勅內事理欽遵施行俱題奉

欽依即日通行各官遵守訖臣等竊詳湖廣貴州雖

兩處用兵楊英李瑾各分責任其所統漢土官軍各據彼處鎮巡官原奏該調數目各不相干亦無掣肘其榔桂進兵日期彼處鎮巡官原定今年八月進兵本部改擬九月而貴州征進日期因兵糧未集聽彼處鎮巡官徑自約會亦無牽制今都御史鄒文盛等却奏本省八月初三日進勦苗賊而榔桂亦適用兵不能如期且稱本省兵馬畢集而永保土兵未到彼此牽制未免糜費錢糧顯是鄒文盛等不思兵機為重玩忽原議失於預約以致愆期誤事却乃朦朧具奏意圖推託合無本部移咨都察院轉行巡按湖廣

貴州監察御史備查本部節次議擬題奉

欽依內事理逐一查勘調兵征勦貴州苗賊事情的
係何官玩忽故違原擬致有愆期失事緣由務見明
白叅奏定奪正德十二年十月二十二日具題奉
聖旨是這愆期失事緣由着各該巡按御史查明叅
究了來說欽此

為十分緊急賊情事

看得巡按貴州監察御史周文光奏稱迤東都勻等
衛守備都指揮權繼武被賊虜去存亡未的見今地
方苗賊猖獗缺官守備訪得都指揮邵鑑指揮狄遠

事體頗諳夷民信服但邵鑑曾經參問於例有碍
要於內定委一員暫署守備一節查得都指揮邵鑑
先該貴州鎮巡官員交章劾奏託疾誤事擅離信地
已經黜退及本部題奉前項

欽依難便委用外見今貴州都勻地方用兵有事合
無本部移咨巡撫都御史鄒文盛行委指揮使狄逮
管守備所勘事情本年二月內奏行延今八箇月
餘尚未奏報事屬稽遲合無本部再咨都察院行催
巡按貴州監察御史查照本部先題奉

欽依內事理將守備都指揮周吉上緊問結具奏施

行正德十二年十一月初五日具題奉

聖旨是都勻地方着狄遠暫管守備先勘周吉事情還着巡按御史上緊問結具奏不許似前遲悞欽此為十分緊急賊情事

看得巡按貴州監察御史周文光奏內稱都指揮潘勳權繼武王言滿弼管糧叅政胡濂叅議蔡潮不聽鎮巡官節制輕犯賊巢蔡潮又差人止住總兵官李昂緩兵不進以致殺虜都指揮權繼武王言殺死千戶何宏伍經百戶顧恒死亡軍士五六百名及稱潘勳滿弼并遇敵退怯都指揮金章等并叅政胡濂叅

議蔡潮俱律合提問一節切照調兵殺賊出自

上命鎮巡等官原奉

勅內各有該載應行事宜而潘勲行伍庸流蔡潮胡
濂擅發官軍失機誤事情犯深重合無差人拏解來
京惟復行令巡按御史就彼提問監候奏請發落伏
乞

聖裁其餘奏內原叅都指揮金章等合行巡按御史
提問照依律例議擬發落及照巡撫都御史鄒文盛
總兵官李昂素無約束致令潘勲等擅弄兵權又聽
蔡潮阻止進兵以致失事亦難辭責查得各官見令

督兵征討苗賊合無候班師之日有功准贖前罪無功一併叅奏究問正德十二年十一月二十二日具題奉

聖旨是這地方用兵之際潘勲等并金章等且都不提待賊情稍寧一併叅了來說欽此

為捷音事

該巡撫貴州地方兼理軍務都察院右副都御史鄒文盛題臣節該欽奉

勅已命湖廣總兵官楊英都御史秦金前去鄰近清浪等處相應地方往會同尔及貴州總兵官李昂

各提督將守備三司等官整理兵糧相機撫勦其
貴州錢糧照依該部奏准事理隨宜督理軍餉勅內
該載未盡者亦聽爾等便宜而行事體重大者奏請
定奪官軍人等斬獲功次送巡按無紀功御史處紀
驗欽此欽遵查得接管卷內正德十一年二月初四
等日節據清平衛申稱本月初二等日被車枕等寨
反賊阿傍阿皆阿革等借稱苗王糾拽苗衆攻燒本
衛關廂屯堡驛站殺虜人財等情該先任巡撫右副
都御史曹祥等查照兵部題

准事例會同鎮巡衙門議調本省官土義兵行委守

備都指揮周吉統領及委分守右叅議蔡潮調度會
同清平衛註俸都指揮王言等相機撫捕本月初六
日都指揮王言率領家丁王昭義兵顧惠等出城與
賊對敵斬首一顆凱里冠帶土舍楊弘見賊攻圍清
平衛城領兵迎敵本月初八日楊弘斬首二顆初九
日土舍楊弘斬首一顆頭目王茲斬首二顆各賊退
回香爐山劄營本月十四日卜五寨熟苗阿頂等前
去丹溪堡救護與賊對敵斬首一顆本月十五日上
舍楊弘領兵哨捕香爐山下苗賊敵殺土兵阿陳蘇
慶羅伏保等斬首一顆本月二十四日清平衛百戶

顧恒領兵於接梁坡裝塘遇賊迎敵軍人鄭谷真斬
首一顆本年三月初二日該叅議蔡潮都指揮周吉
王言清平衛指揮周勲等差木僚鄉導阿洪羅成等
反謀省諭各賊輸情當出木刻牛隻告退官軍將虜
去男婦袁保等放出給主立石為證苗賊陸續下山
安業量留官軍守城楊弘土兵掣回續據叅議蔡潮
呈稱平越衛楊義司管下葛洞寨反賊阿高等糾拽
香爐山賊首阿傍阿皆阿革阿義等於本年四月初
二日夜復出燒劫清平衛朱官屯一帶人家初三日
攻燒平越衛楊老站關廂本職當差清平平越二衛

指揮王濟王武王鵬曹章千百戶王昌何璽等率領
官軍義兵前去本堡截殺斬首六顆各賊稍退本日
於洛邦鋪遇賊敵殺斬首五顆本月初四日於洛登
鋪斬首一顆本月初五日各賊復來攻打楊老站探
知錦衣衛百戶丁文賡

勅經過在於煙墩坡起塘與護送官軍對敵射傷苗
賊十數人陣亡指揮王杞百戶李英汪純方桂及義
兵胡裕等三十餘人本月初九日攻燒重安站本職
當令守哨興隆衛指揮鍾鼎重安長官司土舍馮綸
領兵截殺斬首九顆生擒苗賊一名阿訖餘賊奔走

墮崖溺水死者不計其數本日餘事蔡中孚督衍平
越衛指揮劉懷率領舍人劉通義兵盧文成等哨至
麻哈江遇賊對敵斬首二顆本月二十日叅議蔡潮
督發義兵前去怪石山裝塘擒獲苗賊阿猴阿容阿
北阿辱四名本月二十四日本職調發苗義等兵勦
殺尾捧反寨截路苗賊斬首一十顆生擒稱王賊首
一名阿講僭稱調軍旗牌苗賊一名阿肉俘獲苗婦
四口水黃牛一十一隻兇器四十件米把二千餘擔
燒毀賊米倉四百五十餘間又據守巡等官及清平
等衛呈申香爐山并都叅都蘭葛洞等寨賊首阿傍

阿皆阿革阿罕阿高阿葵阿燭等終日聚衆僭稱苗
王攻圍城堡殺虜人財阻塞道路急請添兵勦殺等
因該鎮巡三司等官會議一面奏請兵糧一面量調
本省官土義兵并偏鎮等衛戍兵行委叅將浴忠守
備都指揮周吉指揮楊仁等統領及委分守右叅議
蔡潮分巡僉事蔡中孚調度截殺據叅議蔡潮呈稱
本年五月初五日會同守備都指揮周吉督同貴州
前衛千戶鄭裕密切計設伏兵清平衛東門外橋下
擒獲香爐山出劫稱王賊首阿罕阿弄阿頓阿釐四
名劇賊阿旦阿禮阿嗽阿茶四名本月初九日會同

分巡僉事蔡中孚叅將洛忠督令指揮鍾鼎土舍馮
綸率領義兵攻克新寨截路反賊斬首一十八顆生
擒苗賊一名阿得俘獲幼男婦女四名口兇器二十
八件牛羊等畜六隻餘賊奔潰落河不計其數被傷
義兵五名又據叅議蔡潮僉事蔡中孚叅將洛中呈
稱本月二十六日各職會行都指揮周吉史勇權繼
武指揮楊仁等將官軍義兵分為四哨進勦葛洞反
寨大小硬固本月二十七日至六月初二初三初四
等日與賊對敵攻開硬固生擒稱王賊首阿高阿仰
阿喇三名從賊阿虎等二名斬首七十五顆俘獲賊

屬男婦一十六名口水黃牛一十一隻米把一千五百餘擔兇器一百七件燒毀賊房米倉八百餘間餘賊奔崖投水死者數多被傷義兵二名彼因糧餉無備量留軍兵防守城堡及將尾捧等寨權為撫安又據貴州按察司開稱守備都指揮周吉督令百戶顧恒於本月二十六日擒獲苗賊阿計等二名解司收問等因各呈報在卷右副都御史曹祥行取回京別用本年八月十五日臣到任接管本月十六日節據兵備副使李麟并都勻府衛各呈申四川管下天壩等處黑苗通虜仰等糾合羊落寨賊首阿貴等統領

三千餘徒攻狗撒毛堡麻略州見今圍住狗場堡城
乞發軍兵救援臣會同鎮巡等官議調龍里等衛官
軍會集原撥防守軍兵行委副使李麟僉事蔡中孚
都指揮周吉提調相機遏截續據各官呈稱分布軍
兵於本月十七日辰時俱至狗場放砲為號四路會
合衝敵賊見我軍勢勇方纔起營掣走當督軍兵追
至地名計羊坡谷蘇隘口等處斬首七顆餘賊退散
又據副使李麟叅議蔡潮呈稱賊首阿皆已於本年
八月初八日在國病故該臣遵奉前項

勅諭公同貴州鎮巡三司議得賊黨衆多據險負固

未及勦伐先議因圍及查倉庫錢糧缺乏卒難舉兵
一面會給旗榜差委都指揮等官王麟等權為撫處
一面奏請措置糧餉節准湖廣巡撫都御史秦金咨
總兵官楊英手本約會進兵隨將積糧圖備緣由回
報續據分巡等官僉事蔡中孚等呈本年十月十六
日守備都指揮周吉隨帶官軍義兵發哨至地名浴
邦鋪苗賊起塘截路對敵被賊殺死軍人家丁九名
搶去行李卷廂等因臣等查得周吉自接管守備以
來失事頗多為謀未見會本叅奏及委緣事都指揮
邵鑑暫代守備戴罪殺賊又添調安順等州司土兵

兼國原調官軍行委都指揮邵鑑滿弼指揮楊仁等
統領仍行守巡叅議蔡潮僉事蔡中孚將材指揮余
大綸計議調度防守城堡開通道路續據僉事蔡中
孚都指揮邵鑑呈報本年十二月二十八日督兵裝
塘擒獲叛賊一名阿業搜苗軍人一名徐文明又據
叅議蔡潮呈稱會同邵鑑於正德十二年正月十六
日發兵哨至地名木岐坡生擒香爐山出劫苗賊阿
度阿亞二名本月十九日發兵於平路河裝塘斬首
二顆本年二月十六日發兵裝塘卜五寨路口斬首
二顆本年三月初五日發兵木岐坡裝塘生擒苗賊

阿放阿吾二名本月初六日發兵於萬潮山口斬首
一顆又據按察司呈准兵備副使李麟閔稱本月十
一日夜苗賊攻打高基寨有民人晉引等對敵斬首
一顆又據叅議蔡潮呈稱會同都指揮邵鑑滿弼將
材指揮余大綸布置方畧差委千戶何宏督令凱里
土舍楊弘率兵於本月十二日擒獲香爐山羊洛上
寨稱王賊首一名阿貴本月二十九日發兵裝塘羅
仲路口斬首二顆本日土舍楊弘率兵埋伏翁鴉坡
與香爐山反賊對敵斬首五十三顆又據副使李麟
開呈本年四月初三日督兵擒獲糾拽黑苗賊人晉

金普柰二名俘獲賊屬男婦九名口本月十一日苗賊攻打巴郎寨發兵截殺斬首二顆叅議蔡潮呈稱本月十二日發兵平路河埋伏斬首一顆本月二十四日發兵於黃平地界生擒反賊一名阿鷄陸續開報在卷該臣公同貴州鎮巡官督同三司掌印等官查議得措置軍需粗有儲備久守不免糜費會委都司掌印等官都指揮潘勳親詣清平衛會同守巡兵備守備等官叅議蔡潮等再行撫處以決進止續據各官呈稱前項苗賊自知罪大惡極恃險負固不聽撫化熟審事勢決宜進剿及將善惡苗寨盡圖貼說

呈報前來會行湖廣巡撫都御史秦金總兵官楊英
督調原擬漢土官軍及分按差官起調貴州并四川
播州酉陽等衛司官軍土兵刻期本年八月初三日
進勦間又據叅議蔡潮呈報凱里土兵楊弘領兵本
年六月二十七日生擒香爐山苗賊阿李阿包阿遮
三名斬獲門樓寨首惡阿播首級一顆本年七月十
七日准協守湖廣鄖陽地方副總兵李瑾手本開稱
湖廣巡撫都御史秦金總兵官楊英俱奉

欽依征勦榔桂徭賊本職更替楊英統兵征勦貴州
苗賊等因節經行催本官督兵前進續據四川播州

宣慰司申報本月二十四日本司書舍楊相差令家
丁吳澄等在於羊皮虎場擒斬稱王首賊阿吳阿泥
三名又據叅議蔡潮呈稱本年八月初八日本職會
同管糧右叅政胡濂都指揮潘勲滿弼將材指揮余
大綸等設計伏兵砲木寨生擒香爐山稱王首賊一
名阿革本月二十六日叅議蔡潮仍會各官督委百
戶邵剛等伏兵羅茂寨計擒香爐山稱王首賊一名
阿義偕稱調兵旗牌賊首一名阿黎本年九月十二
日又據叅議蔡潮都指揮潘勲揭帖稟稱本月初十
日守備都指揮權繼武都指揮滿弼王言金章等各

率義兵土兵出城四處裝塘遏截本月十一日巳時
果有香爐山反賊約計三百餘人各持標弩突出木
岐坡截路我兵四面起塘奮勇對敵殺死五十餘賊
各因相持緊急難斬首級當有平越衛指揮丘漢親
斬首級一顆各賊奔回地名白崖權繼武王言等奮
不顧身追趕敵殺不期各賊四面埋伏起塘約有六
百人我軍鏖戰又殺死二十餘賊敵至申時我兵飢
困被賊敵死百戶顧恒并義兵十餘人我軍遇晚掣
回守備權繼武都指揮王言與賊對敵至晚未回不
知存亡急發大軍分布進剿以紓危急隨據義兵李

永寬稟稱王言被傷回還等因到臣一面會行兵備副使李麟分巡僉事詹源查勘失事緣由及會本題知一面催兵分哨刻期進剿續准副總兵李瑾統領湖廣官軍并永保二司土兵及據貴州黃平程番安順四川播州酉陽等衛所府州司官舍目把各將擬調官軍土兵統領前來又恐軍兵數少會給告示召集一應官吏監生生員旗軍舍餘諸色人等許令出力報効隨軍殺賊臣會同鎮巡等官相度賊巢險易將調到漢土官軍配分五哨定委叅將洛忠都指揮劉麟陶霖王璽祝鎮葉曇楊淮許詔等統領仍差官

賁執旗牌分哨督戰又委副使李麟叅議蔡潮僉事
許效廉詹源監視右叅政胡濂管理錢糧及行布政
使趙文奎總理僨運接濟并委兵部咨送將材指揮
佘大綸遍歷各哨叅謀督責總兵官李昂副總兵李
瑾統領官軍土兵住劄酌中處所節制分哨調度策
應臣公同太監李鎮居中調度區畫指示監察御史
周文光糾察姦弊紀驗功次擇於本年九月二十一
日進勦前項苗賊已將用兵緣由會本具題及行各
哨督催攻勦副總兵李瑾又於本月二十六日親臨
營伍指示督戰節據監軍副使李麟叅議蔡潮僉事

許效廉唐源各呈奉臣等調度監督各哨漢土官兵
進抵香爐山固下立營五哨會合夾攻柰何賊固四
圍高險懸崖削壁止有陡隘路五處苗賊堅築排柵
關防敵守連日攻戰哀放礮石弩箭軍兵難近雖將
軍火銃爆毒飛槍放打燃燒賊房隨即用水潑滅各
職會同統軍叅將洛忠將材指揮余大綸設法製造
鐵梯爬山虎麻索長梯督同都指揮祝鎮王璽陶霖
劉麟葉曇揚淮許詔領兵保靖宣慰彭九霄永順宣
慰彭明輔等挑選精兵於本年十月初三日寅時先
令乘覺土兵乘賊不防去處沿崖猿攀將鐵梯掛

拽兵上國攻開頭層排柵放火燒燬賊房三十餘間
殺死苗賊百十餘人叅將洛忠督率官兵斬首一顆
奪獲兇器二十件陣亡土兵二名被傷五名都指揮
祝鎮王壘督率官兵斬首七顆俘獲男女二名口水
黃牛六隻兇器一十七件陣亡土兵一十九名被傷
一百名都指揮陶霖劉麟督率官兵斬首六顆奪獲
兇器二十件陣亡軍兵五名被傷一十五名都指揮
葉曇楊淮督率官兵斬首一顆苗賊恃險敵殺收兵
回還未盡勦除初七日都指揮葉曇楊淮督率領軍
指揮張本軍人趙喜生龐文興等在於香爐山前門

生擒首惡一名阿朗奪獲兇器二件初八日叅將洛忠督率凱里土舍楊張頭目馮珪金良蔡勲羅寒李龍等於平茶寨生擒奔逃苗賊阿瓜阿斗二名本日都指揮許詔會同將材指揮佘大綸報効知州游潛永順宣慰彭明輔等生擒兇稍寨稱王首賊一名阿傍又據監軍副使李麟叅議蔡潮僉事許效廣唐源各呈稱督兵連日攻山苗賊據險矢石交下難以取勝各職會同統軍叅將洛忠將材指揮佘大綸等計議摘兵採打竹木架搭揚橋整造戰樓接近賊巢排柵約可攀登督同五哨統軍都指揮祝鎮王璽陶霖

劉麟葉曇楊淮許詔領兵宣慰彭明輔彭九霄指揮
密忠趙銘杜堅崔鏞播州宣慰司土舍羅駿楊杲酉
陽宣撫司土舍冉翰凱里土舍楊張報効知州游潛
都指揮周吉指揮張仁生員李寶等於本月十四日
丑時分隨乘雷雨交作覘賊不備去處先令土兵沿
崖上固殺死守路苗賊砍開排柵齊聲舉號當督各
哨官土義兵并報効人員擁攀蟻附直搗巢穴放火
焚燒賊房米倉烟焰燭天四面夾攻苗賊死戰我兵
奮勇敢至卯時賊衆勢敗叅將洛忠督率官兵斬首
三十四顆俘獲幼男婦女三名口牛馬猪羊等畜三

十隻匹兇器四十件陣亡軍兵六名被傷二十四名
都指揮祝鎮王璽督率官兵生擒苗賊一名阿毋斬
首二十三顆俘獲婦女二口牛豬等畜三十六隻兇
器三百九十三件都指揮陶霖劉麟督率官兵斬首
二十三顆俘獲幼男婦女五名口牛馬豬羊等畜三
十隻匹兇器三十件陣亡軍兵四名被傷二十名都
指揮葉曇楊淮督率官兵生擒苗賊一名阿計斬首
六十四顆俘獲幼男婦女三十一名口牛豬等畜三
十隻兇器二十四件都指揮許詔督率官兵生擒苗
賊一名阿榜斬首七十二顆俘獲幼男婦女三十九

名口兇器二百三十一件米把二千五百餘石陣亡
土兵二十四名被傷一十六名火燒房舍約計萬有
餘間燒死苗賊男婦并牲畜糧食等項不計其數餘
賊奔登山頂我軍就占賊囤劄營攻圍又據監軍僉
事唐源呈准統軍叅將洛忠手本開稱本月十五日
會同僉事唐源將材余大綸計議督同保靖宣慰彭
九霄酉陽宣慰司舍人冉翰凱里土舍楊張目把馮
珪楊升蔡勲莫羊保丁三楊阿美報効冠帶舍人李
縉羅福許德輝王準等分布殺手埋伏山下本職親
詣山頂崖畔擒獲稱王賊首一名王阿肉本日都指

揮陶霖劉麟督率官兵斬首二顆又據監軍副使李麟叅議蔡潮呈稱本月十六日各職同將材余大綸親登絕頂崖畔督同都指揮王言宣慰彭明輔指揮朱衣胡永遠姜宣千戶金蘭冠帶總旗王添仲錦衣衛冠帶舍人夏孜李淮李鑑甯寬等擒獲僭稱總王車枕寨賊首一名阿傍僉事唐源呈稱本日叅將洛忠督令土舍楊張目把馮珪莫羊保蔡勲楊阿美等親登山頂崖畔計擒惡賊一名阿蚌僉事許效廉呈稱本月十七日都指揮祝鎮王璽督率官兵斬首一十一顆奪獲兇器一十三件又據監軍副使李麟叅

議蔡潮僉事許效廉唐源開呈本月二十二日各職
會同統軍叅將都指揮等官洛忠等督同領兵宣慰
宣撫等官舍密切伏兵崖下先令都指揮王言帶同
鄉導陳良等上至山頂半崖與賊斷話令其聽順投
降各賊反持標弩下山迎敵隨即舉號伏兵四起與
賊交戰叅將洛忠督令官兵斬首四顆都指揮陶霖
劉麟督率官兵斬首五顆都指揮葉雲揚淮督率官
兵生擒首惡一名阿浪從賊阿掌等二名斬首十八
顆奪獲兇器四件都指揮許詔督率官兵生擒苗賊
阿呀等二名斬首一十三顆得獲猪四隻兇器四十

三件都指揮祝鎮王璽督率官兵斬首一十九顆奪獲兇器一十七件本月二十四日叅將洛忠督兵生擒苗賊阿歪阿指等九名俘獲幼男婦女三十一名又據監軍副使李麟叅議蔡潮僉事許效廉詹源呈稱餘賊奔據山頂飛崖陡險拒守益堅連日雖已設計陸續擒斬數多未盡殄除會同叅將洛忠將材指揮余大綸督同統軍都指揮陶霖劉麟祝鎮王璽葉曇楊淮許詔領兵宣慰等官彭明輔彭九霄等計議於山半稍有樹木藤蘿蔓延去處密架雲梯本月二十八日先令百戶邵剛土官吳隆帶領鄉導吳寬等

於山前誘賊打話陽為招撫出其不意當督官土義
兵并報効人員俱於山後齊登連用飛槍爆毒放打
苗賊男婦各持兇器迎戰我軍奮不顧身與賊敵殺
賊勢大敗一鼓勦除叅將洛忠督率官兵斬首五十
八顆俘獲幼男婦女八名口兇器五十件陣亡土軍
一名被傷二十四名都指揮陶霖劉麟督率官軍生
擒苗賊阿臧等二名斬首五十四顆俘獲幼男婦女
三十名口兇器五十件陣亡土軍一名被傷二十五
名都指揮祝鎮王璽督率官兵生擒苗賊一名阿桑
斬首五十五顆俘獲幼男婦女二十名口兇器一百

四十七件都指揮葉曇揚准督率官兵生擒苗賊阿弟等六名斬首五十三顆俘獲幼男婦女一十八名口兇器二十四件都指揮許詔督率官兵生擒苗賊阿佬等九名斬首五十七顆俘獲幼男婦女三十二名口兇器七十件苗賊接入崖洞死者不計其數本月二十九日搜捕山箐叅將洛忠督兵生擒苗賊阿改等七名斬首六顆都指揮陶霖劉麟督率官兵生擒苗賊一名阿穰斬首一十二顆得獲兇器七件都指揮祝鎮王璽督率官兵生擒苗賊一名阿岳斬首五顆本年十一月初二日都指揮祝鎮王璽督兵俘

獲幼男苗婦二名口又據監軍統軍副使叅將等官
李麟等會呈爐山搗覆渠魁俱已得獲餘黨擒斬無
遺欲行移兵挾撫黑苗進勦為惡賊巢等因又經會
行各官督委署都指揮等官楊仁等前去漂埧等處
撫處及行叅將洛忠兼督各哨移兵相機撫勦龍頭
黎蘭等寨節據監軍副使李麟叅議蔡潮僉事許效
庶詹源開呈本月十六日叅將洛忠督率官兵攻克
龍頭寨苗賊見我軍兵將到倚恃江水深險沿崖迎
敵軍兵一面撐船擺渡一面躍水過江與賊對敵直
衝賊寨放火焚燒賊房米倉苗賊勢敗奔走我兵乘

勝追殺斬首三十五顆得獲銅鼓五面兇器一十六件陣亡土兵二名被傷一十名都指揮劉麟陶霖督率官兵攻克翁牙寨斬首一十四顆奪獲兇器九件陣亡土兵一名被傷五名都指揮祝鎮王璽督率官兵攻克龍頭上寨生擒苗賊一名阿良斬首二十六顆俘獲幼男婦女六名口本月十七日攻克羅鬼龍劉等寨叅將洛忠督率官兵斬首一十二顆奪獲兇器一十五件燒毀賊房米倉九十餘間陣亡土兵一名被傷四名都指揮祝鎮王璽督兵生擒苗賊一名阿麥本日攻克米勇寨都指揮葉晏楊淮督率官兵

斬首一十九顆俘獲苗婦幼女二口牛馬猪畜一十隻匹兇器二件燒毀賊房四十餘間都指揮許詔督率官兵斬首二十三顆俘獲苗婦幼女三口兇器九十七件米把一千餘石燒毀賊房米倉八百餘間陣亡土兵一名被傷五名本月二十八日至十二月初七八等日統軍叅將都指揮等官洛忠等連日督兵進勦都黎都蘭都蓬重拜密西大支尾捧白蠟酉二鮓馬羅果重夢賈董等寨圍叅將洛忠督率官兵生擒苗賊阿茲等三名斬首四十四顆俘獲幼男婦女一十九名口水牛六隻苗衣十件兇器四十二件陣

白土兵二名被傷六名都指揮陶霖劉麟督率官兵
生擒一名阿黨斬首四十一顆得獲水牛七隻兇器
三十件陣亡土兵四名被傷一十四名都指揮祝鎮
王璽督率官兵斬首八十七顆俘獲苗婦一口兇器
三十九件都指揮葉雲楊淮督率官兵生擒阿得老
受二名斬首一百顆俘獲婦女四名牛馬猪畜六隻
匹兇器四十四件燒毀賊房米倉一百一十餘間都
指揮許詔督率官兵生擒一名阿勒斬首一百二十
五顆俘獲幼男婦女一十一名口水黃牛一十九隻
兇器一百三十件米把一千五百餘擔燒毀賊房米

倉二千四百餘間餘賊奔潰山箐崖洞藏躲督兵搜捕本月初十日僉事詹源呈稱清平衛守把白賈山舍人甄章關惠督領守路寨把俘獲奔逃賊屬幼男婦女二十三名口本日叅將洛忠督率官兵哨至都黎都蘭寨山箐內藏苗賊一夥在彼隨即追捕各賊披執兇器拒敵我軍奮勇截殺斬首一十七顆奪獲兇器七件本月十七日叅將洛忠督率官兵哨捕都黎寨河邊斬首五顆奪獲兇器一件都指揮陶霖劉麟督率官兵哨捕都蘭寨山箐斬首二十五顆又據監軍副使李麟叅議蔡潮僉事許效廉詹源各關呈

本月十二日攻克翁夏硬園苗賊對敵叅將洛忠督率官兵斬首九顆俘獲幼男婦女四名口都指揮祝鎮王璽督率官兵斬首五顆都指揮葉曇楊淮督率官兵斬首五顆奪獲兇器三件本月十三日都指揮陶霖劉麟督率官兵哨捕酉二寨山箐斬首一十顆本日指揮狄遠率領軍兵哨捕董丙山箐生擒苗賊一名斬首一顆本月十四日叅將洛忠督率官兵搜捕酉二寨斬首二顆都指揮祝鎮王璽督率官兵哨至小層洞口與賊敵殺斬首三十七顆奪獲兇器二十一件都指揮陶霖劉麟督率官兵搜捕酉二寨山

箐斬首四顆本月十五日叅將洛忠督率官兵搜捕
都黎都蘭都蓬山箐斬首一十一顆俘獲婦女二口
本月十六日播州凱里土舍楊張差委頭目馮珪隨
同委官指揮周勲千戶沈俊等前去截洞三寨撫理
各苗向化願出銅鼓三面并將香爐山先日逃在本
寨賊人斬首二顆送官贖罪本月十七日叅將洛忠
督率官兵哨捕都黎都蓬山箐斬首四顆本月十八
日搜捕董丙囤叅將洛忠督率官兵斬首九顆都指
揮祝鎮王璽督率官兵斬首六顆都指揮葉曇楊淮
督率官兵斬首六顆奪獲兇器三件本月二十日攻

克乾溪山固叅將洛忠督率官兵斬首一十顆俘獲
幼男女二名口都指揮祝鎮王璽督率官兵斬首六
顆都指揮葉曇楊淮督率官兵斬首三顆奪獲兇器
二件及行據委官署都指揮楊仁督同清平等衛指
揮周勲戴清楊義等司土官金洪吳隆四川播州宣
慰司舍把楊杲等并叅議蔡潮各將撫追過天壩等
處黑苗殺占舟溪等軍堡屯田弁招安過老軍黎從
楊保等寨田土戶口數目開呈到臣查得各哨前後
生擒首惡阿傍阿革等共二十名餘黨阿攏等八十
一名斬首一千五百一十九顆通計擒斬過首從賊

級一千六百二十名顆俘獲賊屬幼男婦女三百二十三名口牛馬猪羊等畜二百一十二隻匹兇器一千七百三十九件銅鼓八面米把八千五百餘擔苗衣十件燒毀賊房米倉一萬四千七百二十餘間陣亡軍兵七十三名被傷二百八十名撫過老軍黎從楊保等三百七十五寨招回復業軍民三千八百二十七戶男婦一萬三千九百九十八名口迫復屯口九百六十餘畝前項功次俱該先今巡按監察御史李顯周文光紀驗明白首級發屬梟掛生擒賊犯解貴州按察司監候會問俘獲人口原係被虜者給觀

完聚賊屬照例收養變賣牲畜米把充賞土兵人等
兇器發按察司改造刑具銅鼓苗衣發布政司貯庫
放傷陣亡軍兵給與藥資棺木調理葬埋夷寨屯堡
招安軍民承種外照得巡撫湖廣右副都御史秦金
總兵官楊英巡按監察御史李顯先同奉

命勦賊紀功會處有差各因改差回京不在會同鎮
守貴州地方內官監太監李鎮總兵官都督僉事李
昂巡按監察御史周文光協守湖廣鄖陽地方副總
兵李瑾議照苗民逆命自古為然而恃險肆惡於今
獨甚倡亂於阿傍阿皆之桀酋蠢動於車碗門樓之

諸寨動稱六十年氣數皆然輒以韋同烈故事藉口
呼吸之間蟻聚蜂屯奔跳之際鴟張豕突自清平興
隆以及偏頭諸衛欲攻阻上京之路由平越新添以
及龍貴諸鎮欲據為已有之區軍屯財畜燒劫無遺
衛堡城池攻圍不次哨聚香燼巢穴敵殺應捕官軍
若居民若行旅殘傷無筭若村市若鎮店搶掠一空
稱呼自為苗王出入僭乘轎馬惡焰重熾於遠近兇
聲連絡於蠻夷請兵討罪湖廣交章得

旨會師撫征並舉蓋叛逆久錮於冥頑顧招安適資
乎玩侮大兵壓境猶戕殺軍職方面厥罪滔天寔自

絕生成覆育神人共憤征勦何疑于是預分玉石明
示恩威大會三省之兵共圖萬全之計舍羽翼之羣
寨先根本之香爐四面圍繞五哨夾攻官軍土軍輪
番攻擊軍器火器錯雜交施厚賞激之於前嚴罰懾
之於後是以官兵各輸謀勇共圖成功或造樓接戰
或架梯攀登我攻之無間於晝夜彼禦之莫救乎東
西覘其無備之處密為暗取之謀一登而戮其梟桀
銳鋒已挫再登而斬其首從巢穴盡燔種類盡於三
登根株不遺一縷軍聲震地烟焰燭天數拾尋巖嶮
之山一朝失險千百年逋逃之寇一旦誅夷香爐摧

裂夷寨震驚舉此加彼順若建瓴圖易先難勢如破竹故傳檄漂埧諸苗輸誠納款歸我侵疆加兵黎蘭等寨落膽飛魂以次授首必渠魁之是誅縱脅從而
不問師雖無敵兵不窮追功幸有功難歸破險維茲
賊巢諸夷窺望名為香爐形如磨盤之下壁立四圍
堅若金城盤之隅平行十頃穩稱巢穴而盤之上則
突兀盤旋可望而不可登也賊據此以為天險人望
之以為虎穴先年賊衆哨聚寔屢王師以兵二十三
萬連營數十餘里圍之數月竟至老師而費財得一
首賊還尔班師而奏捷是以賊未痛遭挫切心常徂

於反叛動因小忿弄兵每以前事藉口今兵不滿五萬未及三月破先年不能破之山滅先年不能滅之賊功高往昔威震群夷皆

皇上聖武布昭乎遐邇英謀妙契乎神人而本兵大臣與帷幄元老又能運謀指示默中機宜所謂屬於廟廊之上以誅其事者故將士得以奮銳貅之勇而臣等亦得以效犬馬之勞以致有此克捷地方底寧軍民胥慶從事官僚如叅將洛忠都指揮葉晏楊淮許詔陶霖劉麟祝鎮王璽專哨統軍料敵制勝而叅將洛忠與委官署都指揮楊仁分布撫處尤盡心力

副使李麟叅議蔡潮僉事許效廉詹源監軍紀驗革
弊籌畫而叅議蔡潮先同緣事都指揮邵鑑防禦撫
捕久著勞勩督糧有措置之方供軍無缺乏之患貴
州叅政胡濂之勞可錄給軍餉於經過之時防搔擾
於必由之處湖廣叅政張天相僉事汪玉之長可數
貴州布政司見任布政使趙文奎陞任布政使陳雍
綜理錢糧區畫惟謹都按二司見任按察使林長繁
都指揮王麟緣事都指揮潘勲協贊戎務幹理亦勤
至如將材宣慰與凡領征百執事漢土官目或叅謀
逐殺或督責駿奔亦皆宣力効勞而不敢有怠焉者

也臣等又恐大兵既掣漏殄殘賊及新撫夷寨或至
乘虛反側議留本省并輪戍官軍行委叅將等官統
領於各該衛堡住劄防守會同兵備守巡官將殘破
城池關隘逐漸修理以為長久之圖遇有殘賊出沒
相機追捕以靖地方初附夷民資助安插使得生理
候至明年三四月間苗夷歸農地方無事將前留官
軍發回該衛所看伍差操其四川管下天漂天埧等
處黑苗雖經挾撫退回巢穴但性類犬羊叛服不常
乞

勅該部轉行彼處巡撫巡按督行該道守巡官嚴督

播州宣慰楊斌責令該管舍目不時撫諭不許仍前越境侵占貽患地方除官軍人等獲到功次該巡按紀功御史查照造冊及將僭王首惡阿傍等會審明白各另具奏軍中用過錢糧等項行布政司造冊徑繳該部查照已於本年十二月二十一日班師外緣係捷音事理具本專差將材指揮佘大綸奏正德十三年二月十二日奉

聖旨是這苗賊恃眾聚眾攻圍城池敵殺官軍阻塞道路累次不服招撫鄒文盛等乃能督率將士搗平巢穴出師未久即能成功良可嘉尚寫勅獎勵差來

人陞十級賞紵絲衣服一套新鈔一千貫各該有功等項官員人等該陞賞的兵部還看了來說欽此臣等議得正德十一年先任巡撫貴州都御史曹祥等因未經奏請

上命授以成筭輒調土兵勦賊以致掣肘誤事後該本部前項查議節次具奏荷蒙

聖明洞見用兵機宜屢降

勅旨指示方畧各官方知警策遵守致此克捷臣等不過奉行文書修舉職業豈敢言功切照巡撫貴州右副都御史鄒文盛等督理軍務運籌調度勞蹟居

多鎮守貴州太監李鎮協心議處勤勞顯著總兵官
李昂副總兵李瑾統領官軍躬親督戰尤為有功巡
按御史周文光糾察姦弊紀驗功次秉公持正事無
沮撓功亦可錄合無先將李鎮鄒文盛李昂李瑾周
文光照依各年平定賊寇陞錄事例或量陞職級或
加增祿米或錄廕子姪以酬其功及照巡撫湖廣都
御史秦金督調兵糧依期征進亦與有勞合無亦加
賞賚以酬其勞但

恩典出自

朝廷臣等俱不敢擅擬伏乞

聖裁其餘有功官軍人等叅將洛忠等并土官彭九
霄彭明輔等及陣亡之人本部查照紀功文冊另行
議擬具奏陞賞中間先叅有罪人員今次有功亦論
功罪多寡應否准贖緣由奏請定奪再照各官奏稱
四川管下天漂天埧等處黑苗雖經挾撫退回巢穴
但性類犬羊叛服不常乞行四川鎮巡官嚴督播州
宣慰楊斌不時撫諭不許仍前越境侵犯一節合無
本部馬上賫文交與四川鎮巡官計議作何方畧督
委宣慰楊斌管束黑苗不得侵犯貴州境內應施行
者就便從宜施行仍星馳回奏定奪若別有應為議

處事宜亦須作急陳奏不許徒為文具因循坐視以
後黑苗侵犯貴州其四川鎮巡官責必難辭正德十
三年二月二十九日具題奉

聖旨是各官既勦賊成功地方有賴李鎮歲與祿米
十二石李昂李瑾俱陞一級鄒文盛陞俸一級各陞
子姪一人做世襲百戶周文光也陞俸一級待有相
應員缺陞用他其餘官軍人等并土官人員有功陣
亡等項該陞賞准贖的還查擬明白具奏定奪尔兵
部前後運謀制勝指授有方致令各該地方官員遵
守成筭節次勦平盜賊功尤可錄尚書王瓊賞銀三

十兩紵絲三表裏還照依前旨寫勅獎勵侍郎陳王
王憲各銀二十兩紵絲二表裏本司郎中銀十兩員
外主事各五兩欽此

為懲不職以安地方事

看得巡按貴州監察御史周文光奏勘得巡撫四川
都御史馬昊調兵勦殺彝蠻四散奔突繼以芒部烏
撒夷羅烏合潞蔓貴州發兵川兵不至水西土兵被
傷奔潰搶掠致將貴州畢節等衛屯堡殘破馬昊既
不會兵遏截又不發兵策應四川叅政彭杰僉事石
祿便安適已緩於救援乞要將馬昊提解來京送法

司明正其罪彭杰石祿行巡按御史提問一節切詳
馬昊調兵勦賊不先會貴州鎮巡官遏截誠為有罪
本官已因焚燹復亂被劾請

勅切責其水西兵奔潰搶掠事在貴州非馬昊所能
顧理及彭杰石祿緩於救援亦恐別有妨碍况四川
巡按御史未曾勘明回奏見今四川松潘叙瀘兩處
用兵緊關用人合無將馬昊彭杰石祿俱記其罪待
四川事寧及巡按御史勘奏至日通查功過具奏定
奪及勘得革退叅將張泰都指揮王楫指揮夏忠劉
緯陳武張武千戶龔勳秦週俱守禦無方被賊攻圍

屯堡虜掠軍民俱合提問內五楫陳武巡捕撫夷各
效微勞四川芒部土舍隴壽隴政挾軍讐殺不早撲
滅烏撒府土舍安寧女土官奢勿故縱部夷從亂內
隴壽斬獲首級奢勿擒獲賊首功雖可錄不足贖罪
要行各該鎮巡官從重處治一節查得張泰先因巡
撫都御史鄒文盛叅奏已行巡按御史提問未結見
今四川貴州交界地方諸夷作亂貴州畢節等處地
方用人防禦合無將都指揮王楫指揮陳武土舍隴
壽女土官奢勿俱准以功贖罪指揮夏忠劉緯張武
千戶龔勲泰週并土舍隴政安寧俱令戴罪殺賊通

候賊寧之日巡按御史查奏有功准贖前罪無功提問究治正德十四年三月十六日具題奉

聖旨是王楫等准以功贖罪夏忠等姑着戴罪殺賊待賊情寧息之日巡按御史再查他有無功次來說欽此

為十分緊急賊情事

看得巡按貴州監察御史周廷用奏稱貴州迤西地方俱係四川所屬夷寨該道守巡官員經年不行巡歷所屬土官目把得肆桀驁夷苗頻年搆亂凡遇行文催取各官前來會勘撫處視為泛常執拗不聽正

德十三年十一月內四川叅議崔旻僉事王芳都指揮周爵方來貴州各官因循推避未見成功夷羅反肆猖獗官軍遂為殺害道路愈見阻塞叅稱崔旻周爵託故先回王芳妄稱夷賊與彼地方無干擅調女土官奢爵夷兵二千餘名行文赤水衛支給口糧帶軍妻出城及將奢爵帶送永寧不肯放回等情要將王芳罷黜提問崔旻周爵行令戴罪前來會同貴州各該官員相機勦捕事寧就彼提問一節臣等議得御史周廷用所奏不為無見但據貴州分守叅政林茂達等所言終係一面之詞如前項巡按四川御史

黎龍奏據四川分守叅議崔旻等所言自指揮朱永
守備誤挐水西芒部結親白羅羅為強盜監故以致
烏合蠻衆索要賠償人命等情則是釁起貴州不獨
四川守巡官之責緣事干兩省各執一詞若不差官
查勘不惟事不明白各不輸服抑恐處置不當大壞
地方合無請

勅差給事中并刑部郎中各一員前去四川貴州交
界地方吊取節次奏行案卷從公體訪設法查勘要
見各種蠻夷作亂果由何人造端啓釁累次搶殺果
係何人遲誤勘處玩寇養患何人處置乖方致失夷

情或自昔遠夷反側難定兩省地方各因用兵多事以致妨誤并御史周廷用黎龍各奏事情逐一推詳根究得實務在事理不偏情法兩盡使有罪者不得倖免無罪者不至濫及軍衛有司應問人犯就便提問干碍方面以上官奏請定奪及所在官司隱匿卷案占愾人犯不服追問等項亦聽就彼提問叅究事畢之日回京復命仍將處置兩省夷情事宜查議明白另行具奏定奪正德十四年六月二十一日具題奉

聖旨這地方事情關係重大差刑部郎中錦衣衛千

戶各一員前去依擬從公查勘明白議處停當奏來
定奪欽此

為十分緊急賊情事

看得巡撫貴州都御史郝文盛鎮守太監李鎮巡按
御史周廷用叅奏貴州布政司分守右叅議蔡潮惟
欲僥倖於一試不圖計慮於萬全誤用群小之計不
惜垂成之功賊以被誑而敗盟兵亦有因而失利都
指揮王言滿弼既以分統官兵自宜審度進止共期
以倖而成功卒致損威而棄衆指揮劉淮美宣丘漢
王濟千戶楊鳳馬武曹廉范清楮經百戶彭芳劉瑄

丁杲發兵未聞向往臨危亦欠敵愾指揮金章以公
差而蹈危機議發兵而無干預管糧叅政胡濙會處
一城欠阻衆議各官情犯不同俱難免罪又稱叅議
蔡潮先有撫捕保障功後有監軍克敵功與叅政胡
濙籌畫給餉勞勩居多都指揮王言雖稱功少於夷
賊攻圍之日奮勇退敵保全孤城及已故都指揮潘
勲生前調度撫處俱有可錄要將蔡潮胡濙并都指
揮滿弼指揮王濟丘漢百戶劉瑄原著功次准贖前
罪多餘之功仍量陞賞都指揮王言金章指揮劉淮
姜宣千戶楊鳳馬武曹濂范清褚經百戶彭芳丁杲

各將功贖罪陣亡都指揮權繼武千戶伍經何宏百
戶顧恒病故都指揮潘勲各令應襲兒男承襲原職
內權繼武伍經何宏顧恒并義士兵死於行陣似應
量與恤典等因臣等叅詳得各官既稱蔡潮用群小
之計僥倖一試以致失利殺死都指揮權繼武等官
軍一百六十五員名難以免罪却又稱蔡潮先有撫
捕保障功後有監軍克敵功要准贖罪多餘之功仍
量陞賞緣查前項巡撫都御史曹祥等奏內據蔡潮
所呈明開四川播州土舍楊弘率領土兵三千前去
救護斬獲賊級前賊稍退又稱叅將洛忠領軍二千

五百奪過江口開通道路進抵清平解圍蘇困一城
生靈幸得保全顯是保障清平乃楊弘洛忠之功蔡
潮雖與金章發兵斬獲首級其指揮王玘等被賊殺
死及劫燒屯堡殺虜人畜數多皆係蔡潮分守地方
所斬首級尚不足以贖前罪其後大軍征進香爐山
委用蔡潮監督左右哨不過紀驗首級別無功蹟彼
時與蔡潮一時分哨紀驗功次僉事許效廉詹源該
本部題奉

欽依各賞銀十兩紵絲二表裏其蔡潮監督紀驗功
次若不犯罪亦不過如許效廉等擬賞別無多餘之

功況查前項巡撫都御史鄒文盛奏稱據右叅議蔡潮稟報香爐山苗賊要來大路劫糧會議發兵出城
遏截果遇苗賊對敵殺死五十餘賊都指揮權繼武
等不知存亡等因顯是蔡潮誘殺苗賊失事罪重妄
捏賊來大路劫糧殺死五十餘賊以欺都御史鄒文
盛掩蔽已罪情弊顯然又查前項御史周文光奏稱
該鎮守貴州總兵官都督僉事李昂案驗正德十二
年九月初一日出師初四日抵平越初五日據叅議
蔡潮差吏劉曜稟稱彼正在設謀計獲首惡倘兵齊
到清平恐苗驚疑必須住劄稍緩數日初六日又據

千戶鄭裕賚到叅政胡濙叅議蔡潮都指揮潘勲等各稟前因相同等因緣大軍初四日已至平越被蔡潮阻止以致失機罪尤昭著今鄒文盛等將蔡潮前罪俱隱匿不勘却稱別有餘功要加陞賞伏覩大明律內戲殺誤殺各以鬪殺故殺論及告報軍期違限因而失誤軍機望高巡哨之人失於飛報以致損軍皆坐重罪今蔡潮明知總兵官李昂欽奉上命統兵征進已臨賊境乃敢陰懷妬忌之心公行阻止欲自邀功輕信間諜誘殺住寨苗賊擅調官軍不備糧餉以致殺軍失將大損國威又敢捏報苗賊

下寨前來大路劫糧發兵截殺斬首五十餘顆故捏
虛情遮飾欺罔原其罪犯深重法難輕貸及各官奏
稱都指揮王言於夷賊攻圍之日奮勇退敵保全孤
城今查紀功冊內止開王言率家丁斬首一顆同衆
擒獲首賊一名都指揮滿弼奏內擒斬六名顆冊內
止開斬首一顆指揮王濟奏內斬首九顆冊內止開
斬首三顆又先該巡按御史李顯叅奏王濟地方失
事戴罪殺賊指揮丘漢奏內四顆冊內止開三顆都
指揮金章奏內擒斬二十二名顆冊內俱開無指揮
劉淮係劉懷錯寫名字斬首一顆指揮姜宣斬首二

顆千戶馬武斬首一顆曹廉斬首二顆俱功微又與
都指揮王言滿弼指揮王濟丘漢俱係領軍官雖有
斬獲首級舊例不許報功及千戶楊鳳范清楮經百
戶彭芳丁杲冊內俱無開有功次俱難准贖前罪合
無本部移咨都察院行接管巡按貴州監察御史熊
蘭將蔡潮王言滿弼金章王濟丘漢劉懷姜宣楊鳳
范清楮經彭芳丁杲十三名通行提問分別情罪輕
重依律議擬奏請發落干碍原勘問官叅奏定奪其
叅政胡濂既稱事起蔡潮等胡濂止是欠阻衆議後
平賊寨督餉有功并百戶劉宣冊既開有斬首三顆

合無各准贖罪俱免提問再照都指揮權繼武潘勳
千戶伍經何宏臨陣先退被賊殺死百戶顧恒又克
留官銀致失事機俱難優恤其已勘明被賊殺死義
士軍兵一百六十五名并有隱匿未報殺死軍兵
皆由蔡潮等故不設備倉卒督調以致殺死委的情
有可憫合無亦行御史熊蘭嚴督該管衛所官員盡
數查出行令布政司動支官錢將各家屬量加賑給
以示優恤畢日布政司造冊奏繳查考及照原叅都
御史鄒文盛總兵官李昂素無約束致令潘勳蔡潮
等擅弄兵權又聽蔡潮阻止進兵以致失事候班師

之日有功准贖前罪今已班師香爐山苗賊悉已勦
平鄒文盛李昂合無俱免究問正德十四年六月二
十三日具題奉

聖旨是蔡潮等提了問被殺義土軍兵已勘明并未
報的各依擬優恤胡濂及劉宣准贖罪鄒文盛李昂
俱免究問欽此

為積年草賊嘯聚山林劫殺人財攻燒村寨事
看得雲南巡撫都御史何孟春等奏稱十八寨強賊
聚至數千攻燒村寨劫殺人財地方受害要調兵一
萬委官管領及查支剩餘丁銀兩備寧興賞犒之費

天道人事既難猝舉乘間伺時亦合早慮除行三司等官查照逐一議處仍請鎮守衙門

欽降旗牌督催土兵聽候相機撫捕及將在逃知府張縉指以用兵科派銀兩情罪勘報另奏等因臣等議得

朝廷於額外臨安添設副使奉

勅專一整飭兵備及雲南設置鎮巡官其責莫大於防邊衛民今弥勒州監生百姓之家累被十八寨強賊攻劫殺虜死徙過半而副使吳便若罔聞知縱容知府張縉假以調兵科歛財物重為民害不惟風紀

蕩然亦恐通同作弊合無本部移咨都察院行巡按
雲南監察御史將副使吳便行提并差人挨拏在逃
知府張縉依律問罪監候奏請發落以警將來仍咨
吏部推舉附近雲南地方廉幹官員以代吳便本部
行文何孟春將處置十八寨強賊事宜作急會議停
當應撫應勦果斷施行不必仍諉下司展轉疑議合
糊不決致誤事機養成大患如或故違聽巡按御史
指實糾奏正德十五年七月初一日具題奉

聖旨是十八寨強賊聚集人衆攻燒村寨劫殺人財
地方十分受害吳便張縉都着巡按御史提了問何

孟春等議奏地方事情執持兩端含糊不決好生有
負委託着上緊會議停當奏來定奪如或仍前怠玩
致誤事機罪有所歸欽此

晉漢本兵數奏卷十二終